

O Faataitaiga

Na iloa e Iareto sa i ai Iesu Keriso i lana itu.

Saunia e Noelle Lambert Barris
(E faavae i se tala moni)

O lenei tala sa tupu i Farani.

Sa po po atu e Iareto le polo i le isi itu o le malae. Sa taufetuli solo tagata taalo ia te ia, ma fe'i solo o latou seevae i luga o le fola.

"Lea ou te avanoa!" Sa valaau atu ai Kaperielu.

Sa pasi atu e Iareto le polo ia Kaperielu ma tamoe pea. Ona toe pasi ane lea o le polo e Kaperielu. Sa togi e Iareto le polo i le mama.

SWOOSH!

Sa alu i totonu!

"Mandaia le taalo, Iareto," o le tala lea a lona faiaoga ina ua uma le taaloga. "E te iloa, o faataitaiga mo le 'au faaitulagi e toe lua vaiaso fai."

Sa ataata Iareto. Sa na o ni nai tagata taalo sa valaaulia e taumafai mo lena 'au.

"O faataitaiga o le a faia i le Aso Sa," o le tala lea a le faiaoga.

"Faamata e mafai ona e sau?"

Na vave lava ona mou atu le fiafia o Iareto pei ona oo mai.

"I le Aso Sa?" sa fesili atu ai Iareto.

"Ioe. E i ai se faafitauli?"

Sa mafaufau i ai Iareto. O lona avanoa lenei e taalo ai i se 'au lelei tele! Ae o Aso Sa o le taimi lea e alu ai o ia i le lotu ma taulai atu i le Faola.

"O Aso Sa o se aso faapitoa mo a'u," o le tala lea a Iareto.

"Ae o le a ou talanoa i o'u matua e uiga i ai."

I lena po, sa saofai ai Iareto i luga o lona moega ma ona matua. Sa ia togiina lana polo pasiketi i le ea o'ia mafaufau. "Ou te matua manao lava e taumafai mo le 'au," na ia fai atu ai ia Tina ma Tama. "Ae ou te le manao e fai i se Aso Sa. Ou te iloa e sili atu le taua o le Atua nai lo le pasiketipolo."

"O a ni mea e mafai ona tatou faia e fesoasoani ai?" O le fesili lea a Tinā.

Sa feliuai e Iareto le polo i ona lima. "E mafai ona tatou faia faatasi se tatalo?"

Sa ia tuu ese lana polo pasiketi ma tootutuli i lalo faatasi ma Tina ma Tama. "Tama Faalelagi pele," na ia fai mai ai, "Ou te matuai, *matuai* manao lava e taumafai mo lenei 'au

pasiketipolo. Ae o faataitaiga o loo faia i se Aso Sa! Ou te iloa o le Aso Sa o le aso lea ou te avatu ai ia te Oe. O le a se mea e mafai ona ou faia?"

Ina ua uma le tatalo, sa lagona e Iareto se lagona mafanafana.

"O le a sou faalogona?" O le fesili lea a Tina.

"Ou te le alu pe afai e faia faataitaiga i se Aso Sa," o lana tala lea. "Ae e i ai so'u lagona o le a lelei mea uma."

E lua aso mulimuli ane, ae maua e le tina o Iareto se imeli. Na faapea mai o le a faia nei le faataitaiga i le Aso Toonai!

E mafai e Iareto ona faataitai ai *ma* tausia le paia o le aso sapatii! Sa ia iloa na faafogaina e le Tama Faalelagi lana tatalo.

Mo le isi lua vaiaso na sosoo ai, sa fai ai faataitaiga pasiketipolo a Iareto i le malosi na te mafaia. Ina ua oo mai le aso tele, sa faia e Iareto le mea sili na te mafaia. Sa ia tamoe faatopetope i le va o taaloga, fai le tele o ana togi, ma faamalosi atu mo lana au taalo.

"O tagata taalo nei o le a faaauu pea i faataitaiga mo le 'au," o le tala lea a le faiaoga ina ua uma le taamilosaga muamua. "Faamolemole faalogo mo lou igoa."

Sa tātā leotele le fatu o Iareto. Sa ta'ua e le faiaoga le igoa e tasi. Sosoo ai ma le isi. Ma le isi. Sa lagona e Iareto le mou atu o lona faamoemoe e auai i le 'au.

E le'i umi ae uma loa le lisi a le faiaoga. Na te le'i valaauina le igoa o Iareto. O le a le au atu Iareto i le isi taamilosaga o faataitaiga.

Sa nofo Iareto i luga o le nofoa i fafo o le faletaalo ma sioa atu i ona seevae. Sa matua galue malosi o ia. Ae sa ia lagonaina o lana galuega atoa sa faia mo se mea noa.

Ina ua piki o ia e Tina, sa lulu le ulu o Iareto. "Ou te le'i taulia i le 'au."

Sa fusi mau o ia e Tina. "Ou te faamalie atu ona e le'i oo i le mea na tatou manao ai," o lana tala lea.

Sa manava loloa Iareto. Ona oo mai lea o se manatu faamafanafana ia te ia.

"O le a le lelei lava mea i taimi uma i le auala ou te manao ai," o lana tala lea. "Ae e silafia lelei e Iesu Keriso o'u lagona. O loo i ai o Ia i o'u tafatafa."

Na ataata Tinā. "E sa'o oe! Na te silafia ou lagona."

Sa toe ataata atu i ai Iareto. Sa faanoanoa pea o ia, ae sa lelei ona lagona sa malamalama le Faola i ona lagona. Sa iloa e Iareto o le a alofa ma lagolagoina o ia e Iesu i taimi uma. ●

